

四庫全書

史部

欽定四庫全書

關中勝蹟圖志卷二十一

陝西巡撫臣畢沅撰

大川

附水利

漢中府漢水在南鄭縣南三里自褒城界流入又東入城固界書孔傳沔至漢中東流為漢水水經注漢水自合褒水又東逕漢廟堆下又東過南鄭縣南合廉水又右合池水又東得長柳渡元和郡縣志漢水經縣南去縣一百步

褒水在南鄭縣西二十里自褒城界來南流至龍江鋪

西小柏鄉入漢通志一名黑龍江

詳見褒城

廉水在南鄭縣西南四里自褒城界來東北流入於漢
魏書地形志華陽縣有廉水水經注廉水出巴嶺山北
流逕廉川故水得其名又北注漢水太平寰宇記龍岡
山北有廉津廉水所經

老渚河在南鄭縣南十里通志即池水源出籠蓋山經
城東南十五里北流入漢漢書地理志旱山池水所出

東北入漢水經注池水出旱山夾溉諸田散流左注漢

水太平寰宇記旱山下有石池即池水之源

謹按池水本出旱山

通志又謂出龍蓋山蓋有二源矣

壻水在南鄭縣西北又東流入城固界通志即左谷水一名聽水又名智鄉水水經注左谷水出漢北即智水也北發聽山山下有穴水穴水東南流歷平川中謂之

智鄉水

謹按六朝入壻字皆書作聾智水智鄉疑即聾水聾鄉以傳寫而訛也

湧泉在南鄭縣北六十一里天臺山雍勝略其泉地中

行人於泉上甃一井深一尺五寸水深四寸常取此水
禱雨以瓶著井水自湧起注瓶中故名

山河大斜堰在南鄭縣西二十里通志褒城山河第二

堰水東流過小斜堰入縣界首築此堰與褒邑分水灌

溉又東五里為柳葉洞

謹按大斜堰與柳葉洞皆與褒邑共灌田畝下則專灌南鄭

又東為豐立洞

謹按豐立柳葉二洞相連故不著里數

又東八里為羊頭

堰又東五里為度通堰又東三里為小林洞又東二里

為燕兒窩堰又東一里為紅岩子堰又東二里為姜家

洞又東二里為營房洞又東半里為李堂洞又東半里
為李官洞自褒城縣金華堰至此為上壩第二堰水又
東流一里為高橋洞引水東南流分為三溝曰中溝東
溝南溝又東一里為小王官洞又東半里為大王官洞
又東一里為康本洞又東半里為陳定洞又東半里為
祁家洞又東半里為花家洞又東半里為何棋洞又東
半里為高洞子又東半里為東柳葉洞又東半里為伍
家水口又東半里為吳家水口又東半里為王家水口

又東為聶家水口又東至三皇川設木閘以節水分渠
七首曰北高渠次麻溝渠次上中溝渠次北高拔洞渠
次南低中溝渠次柏楊坪渠次南低徐家渠自高橋洞
至此為下灞凡灌田三萬九千四百餘畝又東溝自褒
城任頭堰分山河第三堰水灌田千九百餘畝廉水馬
湖堰在南鄭縣西南八十里通志引廉水灌田堰首在
褒城境東流一里入縣界其下流仍入褒城界廉水又
東北流為野羅堰堰首在褒城境流三里入縣界又東

北為馬嶺堰堰在縣境其下流入褒城界又東北為流
珠堰堰首在褒城境流五里入縣界又東北為鹿頭堰
堰首在褒城境流五里入縣界又東北為石梯堰堰首
在褒城境流五里入縣界又東北為楊村堰堰首在褒
城境流三里入縣界凡灌田一萬四千餘畝

黃土堰在南鄭縣東南二十里通志引觀溝河水作堰

分東西二溝共灌田三千六十畝

已上
南鄭

褒水在褒城縣東一里一統志其上流為紫金水下流

曰黑龍江通志亦名山河史記河渠書孝武時欲通褒斜道及漕事拜御史大夫張湯子邛為漢中守發數萬人作褒斜道五百餘里道果便近而水多湍石不可漕漢書地理志武功縣褒水出衙嶺山至南鄭入沔水經注褒水西北出衙嶺山東南逕大石門歷故棧道下谷又東南逕三交城城在三水之會一水北出長安一水西北出仇池一水東北出太白山是城所名矣褒水又東南得丙水口又東南歷小石門又南歷褒口又南逕

褒縣故城東又南流入於漢拈地志褒水出褒城縣西北九十八里衙嶺山與斜水同源而派分輿地紀勝山河水即褒水出太白山又有石鼓在縣北四十里褒水中擊之有聲又有將軍石亦在水中入谷十五里有石如兜鍪然又有白玉盆亦在水中大石光白其中可實五斗方輿勝覽紫金水在河池縣北一里源出太白山沿流至鳳縣武休關入漢中為山河堰即褒水也縣志褒水在縣東門外南流出褒谷至縣南二十里入漢江

曰兩河口

武關河在褒城縣北百四十里通志一名石溝河自鳳縣流逕武休關東合於褒水水經注所謂一水西北出

仇池蓋指此也

謹按褒水當以出太白山者為正源而武關河則褒水之別源也

丙水在褒城縣西北水經注丙水上承丙穴下注褒水太平寰宇記丙水源出縣西北牛頭山輿地紀勝大丙水源出黃崖嶺下

廉水在褒城縣西南百二十五里通志源出巴州密谷

東北逕雙乳山又北逕中梁山南東北至南鄭界入漢
又讓水在縣西南百三十里一名遜水范柏年對宋明
帝臣鄉有廉泉讓水是也

仙人溝在褒城縣北八十里通志山徑逶迤林木翳翳
其境甚幽

鶴騰泉在褒城縣西南六十里通志源出中梁山由二
穴湧出南注漢中有石梁天成平分兩渠餘水還峽中
下注鶴騰澗為瀑布焉

山河堰在褒城縣東引褒水灌田一統志蕭何始立為

二堰

輿地紀勝蕭何始立為堰後乃語訛為山河

曹參落成之諸葛亮軍駐

漢中踵跡增築至宋復壞吳玠吳璘相繼修治廣溉民田宋史河渠志嘉祐中史炤奏上堰法刻石堰上乾道七年吳玠修六堰濬大小渠六十五宣力最多通志褒水入縣南流至雞頭關下築堰截水第一堰名鐵椿堰在縣北三里今廢褒水南流三里許至縣東門外為第二堰乃山河堰之正身也堤長三百六十步其下植柳

築坎名曰柳邊堰分水灌田首為高堰子又東流三里
為金華堰支分小堰七曰雞翁堰沙堰周家堰崔家堰
何家堰劉家堰跨槽堰又東三里為舞珠堰支分小堰
五曰魯家堰鄧家堰朱家堰瞿家堰白石堰又東五
里為小斜堰又東一里為大斜堰又東五里為柳葉洞
謹按大斜堰柳葉洞與南鄭分水灌漑凡漑縣境田三千六百七十餘畝
第三堰在城南五里流二里至三橋洞分兩派西流者
為西溝東流者為東溝東溝東流七里許至任頭堰又

分二派西為西渠其東流者入南鄭界凡溉縣境田六

百餘畝

謹按山河堰古刻云巨石為主鎔石為輔橫以大木植以長椿又楊絳記云堰導褒水限以石

順流而疏之自北而西者注於褒城

之野行於東南者悉歸南鄭之區

廉水馬湖堰在褒城縣西南一百里通志自縣境梁家

營築堰南流入南鄭界又流一里入縣界又東北流二

十里為野羅堰堰在縣境下流入南鄭界又東北流三

里為馬嶺堰堰首在南鄭境又東北流三里為流珠堰

堰在縣境流五里入南鄭界又東北流六里為鹿頭堰

堰在縣境流五里入南鄭界又東北流為石梯堰堰在

縣境流五里入南鄭界又東北流為楊村堰流三里入

南鄭界

謹按石梯楊村堰首雖在褒邑而所溉皆南鄭田褒邑不沾其利

凡溉縣境田

四千五百六十餘畝

已上褒城

漢水在城固縣南四里自南鄭界流入又東入洋縣界

水經注漢水自長柳渡又東右會盤余水又東左會文

水又東黑水注之又東過城固縣南又東過安陽縣南

沔水出自旱山北注之又左合壻水

謹按安陽故城在縣東

南沙河在城固縣西南三十里通志即盤余水源出巴山北流入漢水經注盤余水出南山巴嶺上泉流分兩南入蜀水北注漢津謂之盤余口又小沙河在縣南十里源出縣東南曹林壩北流入漢

文川水在城固縣西北四十里水經注文水即門水也出北山石穴中長老云杜陽有仙人宮石穴宮之前門故號其川為門川水為門水雍勝略文水兩水合流有如文字宋范柏年對明帝臣鄉有文川武鄉即此

黑水在城固縣西北五里水經注黑水出北山南流入漢庾仲雍曰黑水去高橋三十里諸葛亮牋云朝發南鄭暮宿黑水四五十里指謂是水也括地志黑水源出

梁州城固縣西北太山

元和郡縣志同

臣謹按方輿紀要謂黑水即褒水以褒水一名黑龍江為證然覈其地理褒城在南鄭之西城固在南鄭之東褒水發源褒城西北之衙嶺山南流至南鄭之小柏鄉已入於漢又安得以發源城固之黑水而即

指為褒水乎今不取其說

涪水在城固縣南通志一名鷲谷水漢書地理志安陽縣鷲谷水出西南北入漢水經注涪水即黃水也出南

鄭縣旱山東北流逕城固南城北右岸有悅歸館水歷

其北又北至安陽入沔

謹按禹貢雖指顧師古曰鷲音潛其字亦或從水涪滿古字通

或以為禹貢之潛非是又按史記沔潛之潛皆作涪

壻水在城固縣東北六里通志一名北水河自南鄭界來南流入漢水經注唐公房升仙之日壻行未還約以

此川為居因號曰壻鄉故水亦即名焉又南歷壻鄉溪
東南流逕通關勢南又東逕七女冢又逕樊噲臺南又
東南逕大城固北東迴南轉又逕其城東而南入漢水
謂之三水口府志壻水源出太白山東流逕縣北又東
南入漢又有上中下清溪在縣北七十里源出馬盤山
南流合於壻水

之溪在城固縣北五十里通志潞洄曲折如之字故名
明月池在城固縣東北水經注壻水東逕七女冢水北

有七女池池東有明月池狀如偃月皆相通注謂之張良渠蓋良所開也雍勝略明月池中有臺相傳為漢高祖所築又有七女池按漢中記曰昔人無男養七女父沒女於此負土為冢遂成此池

壻水渠高堰在城固縣西北四十里通志引壻水灌田南流繞慶山而出於山下築一堰為百丈堰堰常有暴水衝淤明萬厯間知縣高登明建石橋以閘暴水仍於兩岸築堤渠道遂無所患壻水又東為五門堰堰有五

門以洩山水元至正間建前明及

本朝康熙間先後修築分水車九輛及七洞以溉田壻水

又南為楊填堰

謹按宋楊從義於河內填成此堰因名

堰截壻水

按亦名截河堰

東南流為幫河堰又東南流有六洞及鷺兒堰新堰而入洋縣界凡溉縣境田三萬六千八百餘畝

北沙河上官堰在城固縣西三十里通志引北沙河水

於東岸作堰又南流西岸有西小堰又南流西岸有棗

兒堰凡溉田三千七百餘畝

謹按北沙河即文川水馬理陝西通志又有鄠公橫

渠二堰
今無考

南沙河萬壽堰通志在城固縣西南四十五里引南沙河於東岸作堰河水又北流五里西岸有上盤堰古名盤蛇堰稍下為下盤堰又北流五里東岸有新堰稍下為平沙堰又北流五里西岸有沙平堰稍下為蓮花堰又北流十里東岸有倒流堰凡溉田七千一百餘畝

小沙河東流堰在城固縣南五里通志在東岸故名東流其在西岸者曰西流堰凡灌田七百餘畝

謹按馬理陝西通志

縣南引小沙河昔有承沙周

公二堰今廢已上城固

漢水在洋縣南二里通志自城固界流入又東入西鄉
界水經注漢水自合壻水又東會益口又東至漢城南
與洛谷水合又東逕小城固南又東歷上濤而逕於龍
下蓋伏石驚湍流也激怒故有上下二濤之名龍下地
名也度此溯洄從漢為山行之始又東逕石門灘山峽
也又東會酉水又東逕媯墟灘又東逕猴徑灘又東逕
小大黃金南又東合蘆蔭溪口

謹按小城固故城在縣東元和郡縣

志漢水經興道縣南去縣一百步太平寰宇記漢水自
發源至此屈曲行三百七十里流入金州漢陰縣界
壻水在洋縣西四十里縣志經城固流入縣境入漢
溢水河在洋縣西二十五里通志即益水北出秦嶺南
流入漢水經注益水出北山益谷東南流入於漢水
瀟水在洋縣西一里通志即洛谷水又名鐵冶河水經
注洛谷水北出洛谷南流右則瀟水注之水發西溪東
南流合為一水亂流南出際瀟城西南注漢水太平寰

宇記瀟谷水一名洛谷水在興道縣北三十里南流注
漢水縣志鐵冶河在縣北百八十里下流入於瀟水

大龍溪在洋縣東北三十里通志即龍涓水輿地紀勝
龍涓水在興道縣二十九里水出龍涓谷屈曲西南流
十五里入漢江通志大小龍溪在洋縣石上有赤書展
溪二字相傳為張魯女感孕生二龍之所

潛水在洋縣東六十里通志源出華陽山東南流入漢

謹按禹貢梁州潛水在廣元縣此水及
城固之潛與經無涉雍勝略諸書皆誤

酉水河在洋縣東七十里水經注酉水北出秦嶺酉谷南歷重山與寒泉合水東出寒泉泉湧山頂望之交橫似瀑布頽波激石散若雨灑其水西流入於酉水酉水又南注漢謂之酉口太平寰宇記寒泉在舊黃金縣北八十四里

金水河在洋縣東百里通志即蘧蔭水一名黃金水源出秦嶺南流至黃金峽之金潭入漢水經注蘧蔭水北出就谷其水南流逕巴溪戍西又南逕陽都坂東又南

歷蘧蔭溪謂之蘧蔭水而南流注於漢謂之蔭口元和
郡縣志黃金水源出縣西北百畝山黃金谷南流經縣
西去縣九里太平寰宇記黃金水在黃金縣西十里南
注漢水

子午河在洋縣東北縣志蒲河源出秦嶺南流會椒溪
文水二河名三河口又至白沙鋪名子午河南流入漢
橫湖在洋縣治西北通志舊有待月臺二樂榭文與可
守洋故蹟也雍大記在洋縣舊州西

錫杖泉在洋縣北念佛巖上通志唐僧法照以錫杖卓地泉遂湧出因名

楊填堰在洋縣西五十里通志引壻水自城固至留村

入縣界首為梁家洞

謹按此尚與城固分水
下則止灌縣境田矣

又東南為

新開洞其北岸為倪家渠魏家渠又東南為柳家洞又

東南為磨眼洞又東南為宿龍洞又東南為趙家洞又

東南為黃家洞又東南為漢龍洞又東南為水磨堰洞

又東南為分水渠其北岸為北高渠又下為野狐洞又

東南入漢江凡溉縣境田一萬八百餘畝

溢水堰在洋縣西北二十里通志源出縣北秦嶺南流五里於東岸築堰分水東南流下為小飛槽為大飛槽為鋤坂堰為腰渠為西渠為石堰渠為吳家渠為北渠為南渠溢水又南流五里於西岸築堰引水西南流為二郎堰又下為高堰洞又下分兩派東流者為東渠西流者為西渠溢水又南流五里於下流截河為堰從東岸分水與溢水偕行而南者為三郎堰凡溉田二千四

百餘畝

漢濱堰在洋縣北十五里通志源出縣北石鏗山南流至周家坎於西岸築堰分水西南流者為漢濱堰漢水又南流五里於東岸築堰分水東南流者為土門堰漢水又南流四里許截河築堰從東分水流至縣西關外者為斜堰下流分東西二渠其地居漢水下流歲苦衝溢明萬厯間知縣李用中甃石數丈仍東開土渠灌漑賴之凡溉田三千四百餘畝

已上
洋縣

漢水在西鄉縣東北百二十里通志自洋縣流入又東南流入石泉界水經注漢水自合遼蔭水又東右會洋水川流漫闊廣幾里許又東歷教頭

子午河在西鄉縣東北百五十里源出子午谷西南流

入於漢

詳見洋縣

洋水在西鄉縣東二十里水經注洋水導源巴山東北

流逕平陽城又東北流入漢謂之城陽水口洋川者漢

戚夫人所生處也

謹按平陽城即西鄉舊縣今在縣南

元和郡縣志洋水

在洋源縣南三百步又逕西鄉縣八里

謹按洋源廢縣在西鄉縣南

太平寰宇記洋水出廢洋川縣東巴嶺北流入黃金縣

界

謹按洋川故城在縣南黃金縣今屬洋縣界

縣志洋河在縣西南三百里

源出星子山流逕縣東合於木馬河

七十二渡河在西鄉縣東南三百五十里雍勝略源出

金竹山其水滌洄凡七十二渡北流入洋河

木馬河在西鄉縣南百步通志一名馬源水東北流合

洋水入漢縣志木馬河源出大巴山在縣南二百八十

里縣西南之左西峽空渠水及縣北之清涼川縣南之
金竹水皆注焉又東北入於漢

清涼川在西鄉縣北五里蒿坪山下通志一名青源川
自洋縣流來入洋河太平寰宇記唐德宗幸梁洋山南
節度使嚴震具軍容迎謁於清涼川即此

楮河在西鄉縣東南二十里通志又有大石川流入紫
陽界合於渚河

謹按即紫陽縣
之小石河也

金洋堰在西鄉縣東南二十里一統志在子午山左有

大渠一分小渠二十五明景泰初知縣邱俊築溉田四

千六百畝

已上
西鄉

故道水在鳳縣北一里一統志自鳳翔府寶雞縣流入
又西南入秦州兩當縣界水經注兩當水出陳倉縣之
大散嶺西南流入故道川謂之故道水又西南逕故道
城東與馬鞍山水合又西南流北川水注之

謹按陳倉
今屬寶雞

故道故城
在縣東

元豐九域志大散關西南有嘉陵谷即嘉陵

水所出自是始有嘉陵江之名方輿勝覽嘉陵江源出

大散關之西去鳳州九十里雍大記嘉陵江在沔縣西北百八十里按類要云其源出大巖縣志云出大散關西恐即大巖也逕鳳縣北徽縣東兩當南略陽西迤邐而入川江灘石險惡至漁關始通舟楫

謹按水經注西漢水西逕蘭蒼

城南又南入嘉陵道為嘉陵水蘭蒼嘉陵皆今秦州禮縣地則是西漢水至禮縣始為嘉陵水也今則鳳縣之故道水與成縣之白水江皆名嘉陵蓋皆嘉陵上流故得通稱矣

黃花川在鳳縣東北十里太平寰宇記大散水出黃花縣東界大散嶺流逕縣西去城十步方輿勝覽大散水

流入黃花川唐有黃花縣

安河在鳳縣東二里通志即馬鞍山水一名斜谷水水經注馬鞍山水歷谷西流至故道城東西入故道水

謹按

此別是一水非郿縣之斜谷水也

紅崖河在鳳縣西七十里通志即北川水源出秦州南流至唐倉合小峪河又流至兩當界入嘉陵江水經注北川水出北洛嶺山南南流逕唐倉城下又南至困冢

川入故道水

謹按唐倉城在縣北

野羊河在鳳縣南七十里通志源出紫柏山東流至廢
邱關與東溝河合

紫金河在鳳縣東南百五十里通志即褒水南流入褒
城界方輿勝覽紫金水在河池縣北一里源出太白山
沿流至鳳州武休關入漢中為山河堰即褒水也

謹按
唐於

鳳州置
河池縣

扞水在鳳縣東北又東北流入寶雞界水經注扞水出
周道谷北逕故道縣故城西又東北歷大散關西入渭

已上
鳳縣

漢水在沔縣城南通志亦曰沔水自寧羗界流入又東入褒城界書禹貢浮於潛逾於沔孔傳漢上曰沔漢書郊祀志秦祀沔於漢中如淳注北方人謂漢水為沔水水經注沔水東南流注漢曰沮口所謂沔漢者也又東逕白馬戍南澧水入焉又東逕武侯壘南又東逕沔陽故城南又東逕西樂城北容裴溪注之又左得度水口又東合溫泉又東黃沙水注之

謹按西樂故城在縣東南元和郡縣

志漢水去鐸水縣一里

謹按鐸水故城在縣東南

縣志明珠曲亦曰

明支曲在縣南即漢江洄曲處

三泉水在沔縣西八十里通志南流二十里入漢太平寰宇記在三泉故縣北二十里山下縣以此名輿地紀勝在大安軍東門外瀕江石上有泉三處大如車輪品列鼎峙泉流涓涓下注水旱無盈縮

沮水在沔縣西三十里通志源出鳳縣南流合於漢即沔水也述異記漢沔會流處岸上有石銘云下至水府

三十一里傳為李斯刻石縣志沮水出縣北百八十里
母豬山南流逕縣北又南入漢

白馬河在沔縣城西三十步通志即澧水出龍門溝南
流入漢水經注澧水北發武都氐中南逕張魯城東又
南逕張魯治東對白馬城又南流入沔謂之澧口

謹按漢沮

縣屬武都郡
即今略陽

太平寰宇記澧水源出西縣北四十五里

獨石谷南流逕縣西二百步注漢水府志龍門溝在縣
西北一里即白馬河也東為卧龍山西為烽燧山其中

如門故名

舊州河在沔縣東二十五里通志卽度水源出百丈坡南流入漢水經注度水出陽平北山南逕陽平縣故城東又南逕沔陽縣故城東而南流注於漢水

謹按陽平故城在今

北 縣東

養家河在沔縣南通志卽容裴溪一名洛水源出巴山其水東北流入於漢水經注西樂城在山上有谷謂之容裴谷有容裴溪俗謂之洛水水南遵巴嶺山東北流

又北逕西樂城東而北注於漢縣志養家河自褒城界大鐵廠來逕縣之鎮阜川北流至黃沙驛入於漢

金泉水在沔縣東南四十五里水經注漢水又東右會溫泉水口水發山北平地方數十步泉源沸涌冬夏湯湯望之白氣浩然言能瘥百病浴者皆有硫黃氣池水

通注漢水

謹按金泉疑即溫泉

黃沙河在沔縣東四十里通志源出雲霧山南流至褒城界入漢水經注黃沙水北出遠山山谷邃險人跡罕

及谿曰五丈谿水側有黃沙也其水南注漢水輿地紀勝西縣有青羊峽黃沙水所出

東池在沔縣東三十里通志沔水所溢相傳為唐賈島避暑之所

石刺塔堰在沔縣東北三十五里通志引舊州河水分兩派東流者為山河東堰西流者為山河西堰凡溉田六千九百餘畝

石燕子堰在沔縣東北三十里通志引黃沙河水分兩

派東流者為天分東堰西流者為天分西堰凡溉田四千六百餘畝

琵琶堰在沔縣南三十里通志引養家河水首為琵琶堰又北為馬家堰又北為麻柳堰又北為白馬堰一名白崖堰又北為天生堰又北為金公堰又北為湓水堰又北為康家堰凡溉田五千八百餘畝

已上
沔縣

西漢水在略陽縣城西一統志自成縣流入又南經寧羌州西入四川廣元縣界亦曰嘉陵江水經注西漢水

自會脩水又東南於槃頭郡南與濁水合又東南歷漢

曲逕挾崖與挾水合又東逕武關城南東南與北谷水

合又西南逕關城北

謹按槃頭故郡在縣北關城即今陽平關在寧羗州

唐書地

理志元和中節度使嚴礪自長舉縣西疏嘉陵江二百

里元和郡縣志嘉陵水經長舉縣南十里又經順政縣

南百步

謹按長舉故城在縣西北

雍大記西漢水在西和縣源出嶠

冢山雍勝略犀牛江在縣西北百二十里又名東西淮

自階州東流入嘉陵江府志犀牛江源出禮縣自西淮

而下舟楫可通流至兩河口合嘉陵江

謹按嘉陵江源有三西和縣之

西漢水一也成縣之濁水二也鳳縣之故道水三也考水經注及禹貢雖指皆以自西和流逕禮縣成縣者為嘉陵正源即所謂淮河者也乃今皆以淮河為犀牛江而濁水故道水羣目為嘉陵江是循流而忘其源矣如雍勝畧府志皆沿其誤今特為正之

故道水在略陽縣北百二十里通志自大散關分水嶺之南逕鳳縣又逕徽縣至大魚關可通舟楫又至縣北合白水江又至兩河口合淮河又合橫現河逕縣城南南又合夾渠八渡二水又合樂素河逕陽平關至廣元

縣入蜀

謹按樂素河一作樂索河其水東南流入故道水

白水江在略陽縣北百二十里通志即濁水水經注濁水自合故道水又南逕槃頭郡而南合鳳溪水又南注漢水太平寰宇記左溪水在鳴水縣西南七里自栗亭

縣北來合於嘉陵江

謹按左溪即鳳溪今縣西北有青泥河疑即此水

橫現河在略陽縣西十五里府志其水東南流入嘉陵

江

謹按疑即水經注之挾崖水

百八渡水在略陽縣東八十步通志即北谷水一名黃

坂水源出退水河自徽縣來經城西南入嘉陵江水經
注北谷水出武興東北而西南流逕武興城北又南轉
逕其城東而南與益水合水出東溪西流注北谷水又
南流注漢水太平寰宇記黃坂水在順政縣東一里府
志一百八渡水源發三川衆水合流經一百八渡遶城
東南會夾渠水入嘉陵江其夾渠河在縣東二里源發
飛仙嶺西入百八渡河

謹按百八渡水即水經注之北谷水太平寰宇記之黃坂水而

夾渠水即水經注之東谿水也

沮水在略陽縣東北百二十里通志一名鐸水河俗稱

黑河東南流入沔縣界漢書地理志沮縣沮水出東狼

谷南至沙羨南入江

謹按沮縣故城在縣東沙縣今屬湖廣漢陽縣

水經注沔

水出武都沮縣東狼谷中一名沮水關駟曰以其初出

沮如然故曰沮水縣亦受名焉導源南流泉街水注之

又東南逕沮水成而東南流入漢曰沮口所謂沔漢者

也

謹按水經注亦以沮水為漢源

泉街水在略陽縣東北漢書地理志河池縣泉街水南

至沮入漢

謹按河池今屬鳳縣

水經注泉街水自河池縣東南流

入沮縣會於沔

已上略陽

西漢水在寧羌州西北百里通志自略陽界流入又西

南入四川廣元縣界水經注西漢水自合北谷水又西

南逕關城北除水出西北除溪東南流入於漢漢水又

西南逕通谷合通谷水

謹按今州北百二十里有燕子河疑即通谷水然無可考

又

西南寒水注之

謹按今州南六十里有西流河一名韓溪皆以為即古之寒水然與水經注入

漢之序不合

又西逕石亭戍廣平水東南流注之元和郡縣

志嘉陵江經金牛縣西去縣三十里

謹按金牛故城在州東北

太平

寰宇記嘉陵江在三泉縣西半里

謹按三泉故城在州西北

廣平河在寧羗州西北陽平關西通志其水南入嘉陵江水經注廣平水西出百頃川東南流注漢

漢水在寧羗州東北通志一名漾水一名沔水東南流入沔縣界水經注山海經所謂漢出鮒鰭山也東北流得獻水口漢水又東北合沮口同為漢水之源宋陸游文集嘗登嶓冢山有泉涓涓出山間是為漢水之源即

安國傳所謂泉始出山為漾者也

謹按漢水始出為漾合沮為沔東流為漢

蜀道驛程記出沔縣西門曲折行亂山中沔水流經其中西涉沮水抵大安驛沔沮之間濶者未丈許狹者纔二三尺沙石磷磷深不沒踝自大安西南亂山益稠至金牛驛北望嶠冢巍然雲表一小水自西東流即所謂嶠冢導漾者也水纔濫觴不沒鳬雁合五丁峽水東流為沔其流始大又自寧羗州行十里渡水過百牢關關下有分水嶺嶺東水皆北流至五丁峽北合漾水入沔

嶺西水皆南流逕七盤關龍洞合嘉陵水為川江

臣謹按嶓冢有二漢水亦有二其出秦州嶓冢山歷禮縣成縣南流入略陽縣經寧羌州而西入四川廣元縣界者此嘉陵江之正源西漢水是也其出寧羌州嶓冢山東流經沔縣褒城南鄭城固洋縣之南西鄉縣之北又東經石泉縣南乃折而南經漢陰及紫陽縣之西復折而東出興安州之北又東經洵陽縣南白河縣北而入湖廣鄖陽府界者此即禹貢嶓冢

導漾東流為漢之漢水也夫隴西嶠冢非禹功所及而西漢水亦無漾沔之名其以秦州嶠冢及漢水繫之禹貢者誤自班固漢書地理志而常璩華陽國志桑欽水經酈道元注皆因之而不能辨近時惟胡渭禹貢錐指始以嶠冢漢水之在寧羗者為應經義其說允為可從文繁不能具載著其大指如此

瀕倉河在寧羗州東北九十里通志逕鐵佛寺東流四

十里入漢一名東流河

謹按即沔縣之三泉水

玉帶河在寧羌州城北通志源發州南箭竹嶺流逕城西而北而東復會於東南盤曲若圍帶然故名又東至沔縣入漢又有沔水河在州西二十里曲折南流十五里合於玉帶河

蓮花池在寧羌州西門外府志南山如屏障小山聯絡如畫灘聲清響如雜絲竹

七里堰在寧羌州西南七里通志堰沔水灌田千餘畝

已上
寧羌

關中勝蹟圖志卷二十一

欽定四庫全書

關中勝蹟圖志卷二十二

陝西巡撫臣畢沅撰

古蹟

第宅

漢中府漢武侯琴室一統志在沔縣東南定軍山下室內有石琴相傳諸葛亮所御

宋范柏年宅通志在南鄭縣西南梁州記范柏年漢中人謁宋明帝因語廣南貪泉柏年對曰臣郡有文川武

鄉廉泉讓水臣所居在廉讓之間即此

唐草涼樓一統志在鳳縣東北六十里舊傳明皇駐蹕於此

望雲樓一統志在洋縣北世傳唐德宗幸梁洋嘗登是樓御題十字於梁上及還京鑿取以歸

秋興亭一統志在沔縣舊治內唐刺史賈載所築

宋柱石堂府志在府治內文同建又有臨漢堂四照亭

綠景亭凌雲榭皆同所締造

襲美堂一統志在洋縣治內韓億韓絳父子相繼知州
事有美政洋人德之為建此堂

郡圃一統志在洋縣治北文同知洋州即唐時舊圃飾

其臺榭政暇賦詩蘓軾遙和之

宋蘇軾和文與可洋川園池湖橋詩朱闌畫柱

照湖明白葛鳥紗曳履行橋下龜魚晚無數識君拄杖
過橋聲橫湖詩貪看翠蓋擁紅粧不覺湖邊一夜霜卷
却天機雲錦段從教匹練寫秋光書軒詩雨昏石硯寒
雲色風動牙籤亂葉聲庭下已生書帶草使君疑是鄭
康成冰池詩不嫌冰雪遶池看誰似詩人巧耐寒記取
義之沈硯處碧琉璃下黑蛟蟠竹塢詩晚節先生道轉
孤歲寒唯有竹相娛麤才杜牧真堪笑喚作軍中十萬
夫荻浦詩雨折霜乾不耐秋白花黃葉使人愁月明小

艇湖邊宿便是江南鷓鴣洲蓼嶼詩秋歸南浦蟋蟀鳴
霜落橫湖沙水清卧雨幽花無限思抱叢寒蝶不勝情
望雲樓詩陰晴朝暮幾回新已向虛空付此身出本無
心歸亦好白雲還似望雲人天漢臺詩漾水東流舊見
經銀潢左界上通靈此臺試向天文覓閣道中間第幾
星待月臺詩月與高人本有期挂簷低戶映蛾眉只從
昨夜十分滿漸覺冰輪出海遲二樂榭詩此間真趣豈
容談二樂并君已是三仁智更煩詞妄見坐今魯叟作
瞿曇漁泉亭詩聞道池亭勝兩川應須爛醉答雲煙勸
君多揀長腰米消破庵中萬斛泉吏隱亭詩縱橫憂患
滿人間頗怪先生日日閒昨夜清風眠北牖朝來爽氣
在西山霜筠亭詩解籜新篁不自持嬋娟已有歲寒姿
要看凜凜霜前意須待秋風粉落時無言亭詩殷勤稽
首維摩詰敢問如何是法門彈指未終千偈了向人還
道本無言露香亭詩亭下佳人錦繡衣滿身瓔珞綴明
璣晚香消歇無尋處花已飄零露已晞涵虛亭詩水軒

花樹兩爭妍。秋月春風各自偏。惟有此亭無一物。坐觀
萬景得天全。谿光亭詩決去湖波尚有情。却隨初日動
簷楹。谿光自古無人畫。憑仗新詩與寫成。過谿亭詩身
輕步穩去忘歸。四柱亭前野竹微。忽悟過谿還一笑。水
禽驚落翠毛衣。披錦亭詩煙紅露綠曉風香。燕舞鶯啼
春日長。誰道使君貧。且老繡屏錦帳咽笙簧。袂亭詩曲
池流水細鱗鱗。高會傳觴似洛濱。紅粉翠蛾應不要。畫
船來往勝於人。蘆葦亭詩日日移牀趁下風。清香不盡
思何窮。若為化作廬千歲。巢向田田亂葉中。茶蘼洞詩
長憶故山寒食夜。野茶蘼發暗香來。分無素手簪羅髻
且折霜蕤浸玉醅。筍簫谷詩漢川修竹賤如蓬。斤斧何
曾赦。擗龍料得清筍饒。太守渭川千畝在。胸中野人廬
詩少年辛苦事犁鋤。剛厭青山遠故居。老覺華堂無意
味。却須時到野人廬。寒蘆港詩溶溶晴港漾春暉。蘆笋
生時柳絮飛。還有江南風物否。桃花流水鱖魚肥。此君
菴詩寄語菴前抱節君。與君到處合相親。寫真雖是文

夫子我亦真堂作記人香橙徑詩金橙縱復里人知不見鱸魚價自低須是松江烟雨裏小船燒薤擣香薷南園詩不種天桃與綠楊使君應欲候農桑春畦雨過羅紉膩麥隴風來餅餌香北園詩漢水巴山樂有餘一麾從此首歸途北園草木憑君問許我他年作主無

嘯歌堂名勝志在鳳縣治內黃庭堅過鳳州詩有嘯歌山水重之句後人因建此堂

吸月亭一統志在鳳縣治後宋時建取蘓軾勸君且吸杯中月句為名

飛蓋亭方輿勝覽在鳳縣治內縣出金絲柳宋元豐間

有旨取百株邵康節詩楊柳垂金絲風動如飛蓋後於此建亭取以為名

領要亭一統志在南鄭縣治內虞允文建外覽江山內瞰城郭取杜甫詩佳處領其要為名又有漢節亭亦允文建取杜詩漢節梅花外句意

古蹟

祠宇

上古黃帝廟一統志在城固縣西南二十里

夏禹王廟通志在寧羌州北八十里嵯冢山下明御史

舒鵬翼記云嶧冢為漢江發源禹寔經焉故祀

周伍子胥廟通志在城固縣北百丈堰元至正元年建
漢高祖廟在南鄭縣南漢水濱一統志相傳高祖遊憩
於此後人立廟祀之

鄮侯廟在府治堂東通志祀漢相蕭何明洪武十五年
建又褒城縣流珠堰側有鄮侯廟相傳堰為何所築故
祀之

淮陰侯廟府志廟有二一在南鄭米倉山下一在褒城

縣孤雲山祀漢韓信

留侯廟一統志廟有二一在城固縣東三里一在洋縣

西四十里雲山祀漢張良

謹按雲山即子房山

惠遠侯廟一統志在褒城縣山河堰祀漢曹參宋政和中賜額通志相傳山河堰為漢相曹參所建引水灌田後人樂利立廟祀之

諸葛武侯廟通志在沔縣東五里蜀志本傳景耀六年詔為亮立廟於沔縣裴松之注襄陽記曰亮初亡所在

求為立廟或以為可聽立廟於成都後主不從步兵校尉習隆中書郎向充等上表曰亮德範遐邇勲蓋季世興王室之不壞寔斯人之是賴而烝嘗止於私門廟像闕而莫立非所以存德念功追述在昔者也今若盡順民心則瀆而無典建之京師又逼宗廟臣愚以為宜因近其墓立之於沔陽使所親屬以時賜祭凡其臣故吏欲奉祠者皆限至廟斷其私祀以崇正禮從之續文獻通考元至治元年三月追封漢諸葛忠武侯為威烈忠

武顯靈仁濟王通志唐貞元十一年左僕射嚴武增修
有記元至元六年明永樂四年皆重修成化十九年巡
撫阮勤奏乞修治賜祭帝令有司修廟歲一祀二十一
年參政謝綬副使劉瓚修廟並勒諸石正德八年都御
史藍璋請春秋致祭勅修廟宇總督彭澤撰記廟中有
石琴一張無弦扣之其聲清越傳是諸葛君手揮之器

謹按唐有廟沈迴碑及

武侯琴吟自叙石刻

張桓侯廟通志在西鄉縣治西關外祀漢張飛明正統

四年山賊逼邑城忽大雨水湧賊不戰而懼時巡撫藍
璋夢獲神助題請勅封武義忠顯助順王建廟歲以八
月祀焉

女郎廟通志在城固縣女郎山祀張魯女女浣衣山下
有白霧蒙身有孕耻之將自殺謂婢曰必剖腹視之如
言得龍子一雙送之漢水後有龍至墓前成谿其下有
女郎廟搗衣砧

晉楊君神祠通志在略陽縣治元和郡縣志在順政縣

西南二里嘉陵山下即楊難當也府志今曰武都王廟
唐延慶寺在褒城縣東十里通志俗呼打鐘寺唐貞觀
中始賜是額明洪武初重修

崇慶寺在褒城縣西二十五里通志俗呼牛頭寺唐貞
觀間僧法融立

寶山寺通志在城固縣東北十五里一名蕙香院唐開
禧時建宋嘉定明正德間屢加修葺殿閣雄麗為一邑
之冠

杜陽院通志在城固縣界仙口剏自唐朝其地左環塔
水右近伏牛岡阜盤旋林麓幽邃為一方之勝

智果寺通志在洋縣西三十里唐儀鳳中建勅賜藏經
宋元間屢修寺中舊有牡丹兩株高可丈餘

開明寺通志在洋縣治南一里古法輪院唐開元中建
中植古柏八株根節礪礪刺史文同留題筆勢飛動
醴泉寺通志在洋縣南十六里唐開元中建元中統三
年更名開化有浮屠

靈巖寺通志在略陽縣南七里唐開元時建舊宇尚存
櫻樹三株摩空直上巘際一松蟠若虬龍前人碑記頗
多宋哲宗御書司馬光清忠粹德之碑亦在此

白鶴觀通志在城固縣西十里老君山唐廣明元年建
有進士王之儀碑宋寶慶二年重修

宋二相祠通志在南鄭縣城內嘉定間丁煇帥興元建
祀張浚虞允文二相魏了翁作記

楊將軍祠通志在城固縣北十五里宋紹興二十九年

建祀總管楊從義袁勅記云從義鳳翔天興人從吳玠立功爵安康郡侯又洋縣城西亦有從義祠

靈澤廟通志在褒城縣南五十里玉泉北宋嘉定三年封神為孚濟侯賜廟額靈澤其加封之牒尚存

乾明寺通志在南鄭縣西三十里中梁山宋淳熙八年新羅國僧來從海東居此寺

龍亭寺通志在洋縣東二十五里宋時建在漢龍亭侯墓前即古龍亭縣故址也

五雲宮通志在洋縣東南宋嘉定十六年建明葉崇德
記神張姓名嘉唐天寶間入宋時洋人立祠祀之禦災
佑民大著靈異元初封正直靈佑忠顯通慧王至元間加
封昭德

崇道觀通志在洋縣西北二十五里宋元豐間建相傳
張三丰嘗居焉

明方正學祠通志在南鄭縣西南祀方孝孺萬歷間知
府項思教建春秋致祭

謹按孝孺嘗官漢中府教授以遜志名其齋蜀獻王改曰正學

勝水寺通志在南鄭縣東南十五里明嘉靖間建泉從佛坐下流出甘冽不竭故名

鎮江寺通志在洋縣東三十里漢水東流氣勢直下至此山迴路轉天成鎖鑰明萬厯間知縣李文芳建寺鎮之故名

普賢寺通志在西鄉縣西北五十里明宣德中建其地二水合流四山環抱得幽遠靜深之槩

鐵佛寺通志在寧羗州北一百三十里原為唐宋古刹

乃華嚴寺舊址遺鐵像三因以為名明萬歷間重建復
鎔銅萬五千斤鑄為佛像

中臺觀通志在寧羌州北一百六十里中臺山明萬歷
間因元帝著靈異建此觀廟宇壯麗為一州勝槩

古蹟

郊邑

唐虞媯墟通志在城固縣西北二十里一統志其地有
二井一苦一甘名曰雙井相傳為舜所居續漢書郡國
志云城固縣媯墟在西北按應劭漢書注媯墟當在今

興安州又考水經注當在洋縣東北界未知孰是

漢拜將壇通志在城固縣東六里水經注大城固北臨
壻水水北有韓信臺高十餘丈上容百許人相傳高祖
齋七日置壇設九賓以禮拜信也

督軍壇一統志在沔縣東南其旁有八陣圖水經注定
軍山東名高平是亮宿營處營東即八陣圖也遺址略
在元和郡縣志八陣圖在西縣東南十里諸葛亮壘門
以石為圖府志八陣圖圖列八陣聚細石為之各六十

四聚作兩層每層各十二聚其跡尚存或為人所散亂

及夏水沒水退如故

謹按督軍壇之名見元大一統志

陽安關寧羌州志在州西北一百里今名陽平關一統

志關城東西徑二里南倚雞公山北傍嘉陵江乃古陽

安關地蜀漢景耀六年姜維聞鍾會治兵關中表請遣

張翼廖化督軍分護陽安關口後魏時謂之關城

謹按古陽

平關即白馬城在今沔縣西中間更置於此仍舊名耳明人乃以為即古陽平關誤矣

連雲棧在褒城縣北十里褒谷口戰國策秦棧道千里

通於蜀漢史記漢王之國張良送至褒中因說漢王燒絕棧道水經注褒水自大石門歷故棧道下谷俗謂千梁無柱也諸葛武侯與兄瑾書曰前趙子龍退軍燒壞赤崖以北閣道緣谷一百餘里其閣梁一頭入山腹一頭立柱於水中今水大而急不得安柱也後諸葛卒於五丈原魏延先退而燒之自後案修舊路者悉無復水中柱經涉者浮梁振動無不搖心蕩目也輿程記陝西棧道長四百二十里自鳳縣東北草涼驛為入棧道之

始南至褒城之開山驛路始平為出棧道之始縣志明

洪武二十五年因故址增修約為棧閣二千二百七十

五間統名曰連雲棧

自縣北雞頭關起一里至石洞又

橋上阻石崖下走龍江最為險峻又三里至倚雲棧即

響水灘前有石佛灣盤龍塢又七里至老君崖又四里

至堡子舖又四里至飛石崖又一里至關王碕又三里

至架雲又八里至逍遙又十七里至馬道舖又十里至

順平又十里至甜竹碕又三里至三岔舖即馬道驛又

五里至燕子崖巨石橫亘江水濛濛又二十里至鳴玉

即巖箕棧又二里至虎頭關又一里至上天橋又三里

至武曲關又一里至大燒碕又一里至碧霄又二里至

石梯又七里至青雲即臘魚溝又數十步至臘魚潭縣

境閣道止此自臘魚潭而北又有焦崖舖黑龍潭飛仙

開石溝橋八里關雲門新開嶺安山灣青陽等棧

方輿紀要自鳳縣至褒城皆

大山緣坡嶺行有缺處以木續之成道如橋然所謂棧

道也其間喬木夾道行者遇夜或宿於巖穴間出褒城

地始平

唐歐陽詹棧道銘并序秦之坤蜀之艮連高夾深九州之險也陰谿窮谷萬仞直下犇崖峭壁

千里無土亘隔呀絕巉巉冥冥麋鹿無谿猿狖相望三代而往蹄足莫之能越秦雖有心蜀雖有情五萬年間賈不相接且秦之與蜀也人一其性物同所宜嗜慾無餘門教化無餘源可貿遷可親昵摩析地脉睽離物理豈造化之意乎天實凝清而成地實凝濁而形當其凝也如鎔金下鑄騰雲上浮空隙有所不周廻翔有所不合澄結既定竅缺生乎其中西南有漏天天之竅缺也於斯有茲地地之竅缺也天地也者將以上覆下憐含

蓄萬靈可通必使而通者也苟有可通而未通聖賢代其工而通之故有為舟以濟川為梯以踰山惟茲地有川不可以舟涉有山不可以梯及粵有智慮以全元造立巨衡而舉追氏絕懸壚以下梓人猿垂絕吳鳥傍危岑鑿積石以全力梁半空於木棚斜根玉壘旁綴青泥截斷岸以虹矯繞翠屏而龍蹠堅勁膠固雲橫砥平總庸蜀之通途繞岐雍之康莊都邑之能步山川之無脛若水決防如鴻向陽南之北之踵武湯湯躋我我以自若臨蒼蒼而不懼繇是勢幣以遙達人神以會同稽禮樂之短長量威力之污隆可王者王可公者公而相次以風或曰受琢之石長存可構之材無窮易利代蠹斯道未始有終鳴乎為上懷來在乎德為下昭德在乎義德義之如今日則或人之言有孚其反之則石雖存恐不為琢材雖多恐不為構想夫往昔有時而有有時而無是用惕惕天下蚩蚩知聖賢創物之意之人寡明德義固物之道之人稀敢陳兩端之要銘諸斯道之左庶

主德義者存今之所履踵武湯者荷古人之攸作為銘
曰天覆地燾本以備設大象難全或漏或缺損多益寡
聖賢代工彼惟有缺與無缺同維北曰秦維南則蜀地
缺其間坤維不續斗起斷岸屹為兩區秦人路絕蜀火
煙孤天實不通賢斯有造鑄堅剋勁無蹊以道若川匪
舟若陸匪車緣危轉虛步驟交如構雖在功存亦由德
項怫劉恣從完以陪隋落我營自顛而植地非革勢材
不易林培植之致惠怨之心勿謂斯道不恒勿謂斯道
可久禮不以禮可有而無恭不以恭可無而有創之之
意如彼固之之理若茲彼知不易茲而易知勒銘道左
其同我思王維送楊長史由棧道入川詩褒斜不容幘
之子去何之鳥道一千里猿聲十二時官橋祭酒客山
木女郎祠別後同
明月君應聽子規

臣謹按關中入蜀之道自古有三一曰褒斜道南口

曰褒在褒城縣北口曰斜在鳳翔府郿縣秦惠王取
蜀之道也一曰儻駱道南口曰儻在洋縣北口曰駱
在西安府盩厔縣魏曹爽侵蜀之道也一曰子午道
南口曰午在洋縣北口曰子在西安府長安縣蜀魏
延欲假奇兵入長安之道也今之棧道蓋即古之褒
斜而駱谷子午山徑險僻僅為間道焉

漢王城一統志在褒城縣南十里又有漢王城在城固
縣東十里南近漢江北枕壻水或曰即劉封所築之樂

城也

張魯城一統志在沔縣西水經注沔水南逕張魯城東
初平中劉焉以魯為督戰司馬住漢中斷絕閣道用遠
城治因即峭嶺周迴五里東臨濬谷西北二面連峰接
崖從南為盤道登涉二里有餘通典西縣西四十里有
關城俗名張魯城

白馬城一統志在沔縣西北即漢陽平關也漢建安二
十年曹操征張魯自散關出武都至陽平關二十二年

先主次陽平關與夏侯淵相拒二十四年自陽平關渡
沔水破淵於定軍山皆即此水經注張魯治東對白馬
城一名陽平關其城西帶瀘水南面沔川城側二水之
交亦曰瀘口城

西樂城一統志在沔縣東南蜀志建興七年丞相亮徙
府營於南山下原上築漢樂二城華陽國志蜀以沔為
漢城以對城固之樂城而言故亦曰西樂城水經注沔
水東逕西樂城北城在山下周三里甚險固通典故

西樂城在西縣西南

諸葛城一統志在沔縣西亦名武侯壘水經注沔水又東逕武侯壘南諸葛武侯所居也南枕沔水水南有亮壘背山向水中有小城太平寰宇記隋開皇三年置白馬鎮於古諸葛城

黃沙城一統志在沔縣東北蜀志建興十年丞相亮休士勸農於黃沙水經注黃沙水側有黃沙屯諸葛亮所開也

街亭一統志在城固縣西十五里太平寰宇記南鄭縣有街亭即蜀將馬謖與張郃戰處

美農臺一統志在南鄭縣東太平寰宇記梁州記云後漢安帝時太守桓宣每至農月親載耒耜以登此臺勸民故後人號曰美農臺

釣臺一統志在城固縣東北五里褒水出谷處巨石高廣相傳鄭子真垂釣於此

樊噲臺一統志在城固縣北五里水經注壻水逕樊噲

臺南臺高五六丈上容百許人輿地紀勝樊噲所築

樊河橋通志在褒城縣東北九十里跨馬道河上漢將

樊噲所建

郝閣通志在略陽縣西二十里一統志漢建寧三年太

守李翕建縣志閣臨江崖高數十丈俗名白崖水溢則

上下不通故李翕鑿石架木建閣以濟行人廢址猶存

宋理宗時太守田克仁以銘字昏訛重刻於靈巖殿之絕

壁在今縣南

漢蔡邕郝閣銘惟斯析里處漢之右溪源漂疾橫柱于道涉秋霖漉盆溢闕涌濤波

涉沛潑揚絕道漢水逆漲稽滯商路當二州經用行
沮沮縣士民或給州府休謁往還恒失日暮行李咨嗟
郡縣所苦斯溪既然卹閭猶甚緣崖鑿石處隱定柱臨
深長淵三百餘丈接木相連號為萬柱過者慄慄載乘
為下常事迎布歲數千兩遭遇隕納人物俱墮沉沒洪
淵酷烈為禍自古迄今莫不創楚於是太守漢陽河陽
李君諱翕字伯都以建寧三年二月辛巳到官思惟惠
利有以綏濟聞此為難其日久矣嘉念高帝之開石門
元功不朽乃俾衡官據下辨仇審改解危殆即便求隱
析里大橋于今乃造校致攻堅結構工巧雖昔魯班亦
莫擬象又醴散關之嶮深從朝陽之平塹減西瀄關高
閭就安寧之石道禹導江河以靖四海經紀厥緒又康
萬里閭
君克明俊德允武允文躬儉尚約化流如神愛民如子
遐邇平均精通皓穹三納符銀所歷垂勲香風有隣仍
致瑞應豐稔年登居民闕樂行人夷欣慕君靡已乃詠

新詩曰析里之閭坤兌之閭高山崔嵬兮水流湯湯地既堦塉兮與寇為隣西隴鼎峙兮東以析分或失緒業兮至於困貧危危累卵兮聖朝閔憐分符抗壤兮廼命是君閭歷救危兮全育閭遺劬勞日稷兮惟惠勤勤拯溺亨也兮瘡夷四起閭闔充閭兮百姓歡欣僉曰太平兮文翁獨存

陰平鎮一統志在城固縣南十八里蜀志景曜中張翼董厥詣陽安關口為諸圍外助至陰平留住待之水經注白水東南逕陰平故城南縣志今名太平村

大散關通志在鳳縣東北五十里與鳳翔府寶雞接界一統志漢高祖從故道敗章邯於陳倉由此以出

詳見寶雞

戚夫人墓一統志在西鄉縣東南二十五里有廟又有

梳妝臺

張騫墓通志在城固縣西二十三里

李固墓通志在城固縣西三十里一統志有石碣題曰

漢忠臣太尉李公神道水經注長柳村名也漢太尉李

固墓碑銘尚存文字剝落不可復識

謹按固為梁冀所害帝哀弟子董班

之義許送至漢中而葬今林

縣及磁州志俱載固墓誤也

七女冢通志在城固縣東北水經注壻水東逕七女冢

冢夾水羅布如七星高十餘丈周迴數畝元嘉六年大水破墳得一碑刻云項氏伯無子七女造椁世人疑是

項伯冢

謹按項伯名纏封射陽侯子雕嗣水經注所疑頗妄辨見王世貞宛委餘篇

張魯女墓通志在城固縣黃沙水南水經注黃沙水南

有女郎山山有女郎冢言張魯女也

詳見祠宇

蔡倫墓通志在洋縣東二十五里龍亭舖南圍一畝許諸葛武侯墓通志在沔縣南十里定軍山下蜀志亮遺命葬漢中定軍山因山為墳冢足容棺斂以時服不須

器物魏鍾會至漢川令軍士不得於墓所左右芻牧樵採水經注亮遺命因即地勢不起墳隴惟深松茂柏攢蔚川阜莫知墓塋所在元和郡縣志貞觀十一年勅禁樵採朱子語類陸務觀說當春月男女上諸葛公墓

馬超墓通志在沔縣東五里關中陵墓志漢建安五年

諸葛武侯軍至沔陽親詣墓所設祭今名馬場謹按四川通志

新都縣南亦有馬孟起墓未知孰是

張嶷墓一統志在褒城縣南柏鄉街世呼褒德將軍墓

通志上多叢木人不敢伐

梁木馬城一統志在西鄉縣西南宋白曰梁大同間於巴嶺側立東巴州治木馬縣即此城

迴車戍一統志在鳳縣南太平寰宇記梁太清五年西魏遣達奚武楊寬率衆七萬由陳倉路取迴車戍入斜谷關出白馬道謂此也

隋百牢關一統志在沔縣西南隋書地理志西縣有關官在百牢山元和郡縣志隋置白馬關後以黎陽有白

馬關改名百牢元大一統志今三泉舊縣西古關是

唐七盤關通志在寧羗州西南六十五里唐書廣明初
行營都統王鐸置關於沮水七盤三溪水皮嶺以遮秦
嶺

褒城驛通志在褒城縣治西今名開山驛元稹為御史
奉使東川飲於褒城驛竇明府廳虞鄉黃丞犯令逃去

再使東川至褒城驛黃丞餽酒稹與同酌徧問褒陽山

水感今懷古作詩贈黃

唐元稹詩昔年曾痛飲黃令困
飛觥席上當時走馬前今日迎

迤邐七盤道坡地數丈城花疑褒女笑
棧息武侯征一種埋幽石空聞千載名

馬盤寨一統志在褒城縣西天復二年王建將王宗播

攻馬盤寨即此

壻水鎮通志在洋縣西北四十里接城固界以近壻水

故名通鑑廣明元年上幸興元至壻水鎮元豐九域志

興道縣有壻水鎮

謹按蔡交洋州詩自注唐公房盡室
昇天其壻會出不得偕昇今其地為

壻水鎮蓋本
之水經注

五代馬嶺關通志在鳳縣西三十五里亦曰馬嶺寨一

統志周顯德二年遣將王景等入散關攻蜀秦州蜀將
李廷珪遣別將據馬嶺寨即此又縣西南一百九十五
里有畫眉關當秦蜀之衝為褒斜要路

白石鎮通志在洋縣東北十里即古白澗鎮通鑑周顯
德二年蜀將李廷珪遣兵出斜谷白澗元豐九域志梁
泉縣有白澗鎮

宋銅場一統志在略陽縣東元豐九域志順政縣有青
陽銅場方輿勝覽青陽驛在縣東五十里

合江倉一統志在略陽縣治東宋開禧中楊巨源監合江倉即此

青石關一統志在南鄭縣南九十里宋置明正德中設巡司於此今因之其地與西鄉縣及四川巴州南江縣相接為通茶要路

武休關通志在鳳縣南二百三十里接褒城界元豐九域志梁泉縣有武休鎮方輿勝覽褒斜谷旁連武休關又極東為饒風關異時獨倚饒風以控商虢由武休以

達長安故關為蜀之咽喉向來薩拉噶攻饒風以迫仙人吳玠劉子羽以死守故不失西蜀諸關不可不嚴其備府志今置武關驛

謹按仙人關在縣西南一百二十里接徽縣界今廢

又土關

隘在縣東南三十五里通志自青岡坪埏過武休關山寨至此甚險峻元將汪世顯取蜀經此

黃牛堡通志在鳳縣東北一百十五里接寶雞界府志據黃牛寨山當散關之衝吳玠將楊從義所築宋史吳玠傳紹興三年金將烏魯扎哈出和尚原陳北山谷路

狹多石舍馬步戰大敗移砦黃牛吳璘傳紹興三十一年金喀齊喀扼大散關遣騎攻黃牛堡璘擊敗之

渭門鎮洋縣志在縣東一百二十里宋置

湖橋洋縣志在縣舊州治北州治園中有湖有橋文同詩湖上雙禽泛泛橋邊楊柳依依蓋宋時已有之

置口通志在略陽縣西北三十里寶虹山下開禧二年

金人由板閘谷遶出關後遂陷吳曦退屯置口

謹按置口即沮

也口

李師顏墓府志在南鄭縣西二十里蘓軾撰誌銘


楊從義墓通志在城固縣北十五里袁勃碑記將軍介
梁洋間居焉卒葬於城固水北村

雍冲墓通志在洋縣東北十五里雍家溝冲為太學生
上書數章惇罪有旨流放興元府楊用中謂張浚曰洋
縣雍冲可與為友

明雞頭關通志在褒城縣北八里關口有大石狀如雞
頭因名自此入連雲棧府志崇禎七年漢中斷棧道守

雞頭關流賊不得前縣志在七盤山下

團樂關通志在西鄉縣東南一百五十里正德間副憲
來天球駐兵於此平荆襄賊



關中勝蹟圖志卷二十二

欽定四庫全書

史部

關中勝蹟圖志卷二十三
四

詳校官太僕寺少卿_臣李廷欽

編修_臣程嘉謨覆勘

總校官進士_臣

朱鈴

校對官編修_臣

錢樾

謄錄生_臣

劉星軫

欽定四庫全書

關中勝蹟圖志卷二十三

陝西巡撫臣畢沅撰

地理

延安府釋名元和郡縣志隋延安郡以界內延水為名
沿革一統志治在省城北七百四十里禹貢雍州之域
春秋時白翟所居戰國初屬魏置上郡秦亦曰上郡漢
元年項羽置翟國尋屬漢仍為上郡

謹按定邊靖邊二縣為漢北地郡地

後漢因之建安二十年郡廢晉時荒廢後屬赫連勃勃
後魏初屬統萬鎮太和元年置偏城郡延昌二年置東
夏州西魏廢帝三年改為延州隋大業三年改州曰延
安郡唐武德元年復曰延州天寶初曰延安郡乾元初
復曰延州屬關內道五代後唐置彰武軍節度宋曰延
州延安郡屬陝西路慶歷元年分置鄜延路元祐四年
升延安府金亦曰延安府元為延安路屬陝西行省明
為延安府屬陝西布政使司

本朝因之領縣十曰膚施安塞甘泉安定保安宜川延川
延長定邊靖邊 府城通志唐天寶初建一云赫連勃
勃築宋范仲淹龐籍經略時增修明初重築周九里有
奇門四

膚施縣釋名通志戰國趙邑名秦昭王以名縣在今綏
德界隋大業初始置於延安界因舊名也

謹按舊傳釋
氏尸毘王割

肉救鵠故縣名膚施然自秦以前
已有是名恐出附會故未敢錄

沿革一統志附郭秦

置高奴縣漢初為翟國都尋屬上郡後漢因之晉廢後

魏為偏城郡廣武縣地隋大業三年始分豐林金明二縣地置膚施縣為延安郡治唐為延州治宋為延安府治金元明不改

本朝因之

安塞縣釋名通志元縣名本宋安塞堡縣從堡名也沿革一統志治在府北少西四十里漢上郡高奴縣地後魏太平真君十年置廣洛縣隋仁壽元年改曰金明屬延安郡大業末廢唐武德二年分膚施復置金明縣兼

置北武州貞觀二年州廢屬延州五代因之宋熙寧五年廢入膚施元初改置安塞縣屬延安路明屬延安府本朝因之縣城通志本金舊堡元初改建周三里有奇

門三

甘泉縣釋名太平寰宇記以其泉甘美為名縣志甘泉在縣南五十里沿革一統志治在府南少西九十里漢上郡雕陰縣隋為洛交縣地唐武德元年分置伏陸縣屬廊州天寶元年改曰甘泉五代因之宋初改屬延安

府金元明不改

本朝因之 縣城通志唐天寶初建明景泰中重築周三里有奇門三

安定縣釋名通志本宋安定堡元因以名縣沿革一統志治在府北少東一百八十里秦置陽周縣屬上郡漢因之後漢省入膚施高奴二縣隋為延川縣地唐為延川延昌二縣地宋置安定堡屬延川縣元憲宗五年升為安定縣屬延安路明屬延安府

本朝因之 縣城通志明洪武初建成化中築東關城周
五里有奇門三

保安縣釋名通志本宋保安軍金以名州元以名縣沿
革一統志治在府西北二百二十里漢高奴縣地後魏
廣洛縣地隋膚施縣地唐置永康鎮宋太平興國二年
建為保安軍屬永興路金大定十一年置保安縣二十
二年升為州屬鄜延路元至元六年降州為縣屬延安
路明屬延安府

本朝因之 縣城通志即古栲栳城明初增築周九里有奇門四

宜川縣釋名通志本後魏義川太平興國中改名避太宗匡義諱也沿革一統志治在府東南二百六十里戰國魏定陽邑漢置定陽縣屬上郡後漢因之晉省後魏大統三年置義川縣及義川郡廢帝三年改州曰丹州後周改縣曰丹陽隋開皇初郡廢復改縣曰義川大業初州廢屬延安郡義寧元年又於縣置丹陽郡唐武德

元年復曰丹州天寶初改曰咸寧郡乾元初復曰丹州屬關內道宋曰丹州咸寧郡屬永興軍路太平興國元年改縣曰宜川金曰丹州屬廊延路元廢丹州以縣屬延安路明屬延安府

本朝因之 縣城通志宋初建明正統中重築周九里有奇門四

延川縣釋名元和郡縣志後魏文安縣隋改延川以吐延川為名沿革一統志治在府東少北一百九十里漢

高奴膚施二縣地西魏置文安縣又置文安郡隋開皇
初郡廢改縣曰延川屬延安郡唐屬延州宋屬延安府
金元明不改

本朝因之 縣城通志本元舊址明正統中重築周四里
有奇門三

延長縣釋名通志延水長流入河因以名縣沿革一統
志治在府東一百五十里漢高奴縣地西魏廢帝元年
置廣安縣隋仁壽元年改曰延安屬延安郡大業末廢

唐武德二年復置延安縣兼置北連州貞觀二年州廢屬延州廣德二年改曰延長屬延安府金元明不改

本朝因之 縣城通志金大定中築周四里有奇門二

定邊縣釋名通志本明定邊堡蓋取底定邊疆之意沿革縣志治在府西北三百五十里漢北地郡馬領縣地唐為鹽州地明正統二年置定邊營屬延綏鎮

本朝雍正九年置定邊縣屬榆林府乾隆元年改屬延安府 縣城縣志即舊定邊營明正統中築周四里有奇

門二

靖邊縣釋名通志本明靖邊堡取綏靖邊疆之意沿革
縣志治在府西北三百里漢北地郡地後魏置闡熙郡
及長津縣隋開皇三年郡廢縣屬夏州唐貞觀七年於
縣置長州十三年州廢還屬夏州元和十五年移宥州
來治宋為西夏地明成化十一年置靖邊營屬延綏鎮
本朝初為靖邊所雍正九年置靖邊縣屬榆林府乾隆元
年改屬延安府 縣城縣志本宋夏州兀刺城明景泰

四年改築新城成化中改置靖邊營後又增築南關城及新軍家丁兩營連環共四城周六里有奇門二

名山

延安府鳳凰山在膚施縣西通志府城跨其上雉堞巍然為郡首山

清涼山在膚施縣東北七十步一統志一名太和山其巔最高一峰曰蓮花峰上有尸毘巖及萬佛洞內有石佛萬餘山半有鷲峰泉定甲泉及仙石洞

五龍山在膚施縣東一里金史地理志膚施縣有五龍山府志山下有黑龍泉

嘉嶺山在膚施山東南百八十步南河之濱通志形勢高峻上有古塔范仲淹大書嘉嶺山三字刻於石一統志隋志有豐林山疑即此

伏龍山在膚施縣北五里太平寰宇記形似卧龍是上郡之名山

牡丹山在膚施縣西南四十里一統志其地多牡丹樵

者採以供薪一名花原頭

卧虎山在膚施縣南十里通志以形似名

已上
膚施

天澤山在安塞縣東五十步通志其山土石相間上有

天津泉四時不竭縣志嶙峋挺峙遠瞰清流上有翟王

泉董翳所鑿

龍安山在安塞縣西一里通志高數百丈狀如盤龍舊

建龍安砦

石峰山在安塞縣北五里一統志巨石高險俗名石嘴

山亦曰雲臺山以上有雲臺觀而名

青山在安塞縣北七里縣志幽谷清窈石磴盤紆中多洞穴為邑人避跡之所

石門山在安塞縣西南百二十里通志兩山壁立如門洛水經其中又相近為墨台山山色如墨不可耕作又馬超洞在洛河中

三塹山在安塞縣西南百三十里太平寰宇記在敷政縣北一里其山土石相雜上有三冢遙望如塹因名

謹按

敷政故城在縣西南已上安塞

伏陸山在甘泉縣城內東北隅元和郡縣志有阿伏斤谷其水出又潛流隱伏川陸故號伏陸天寶元年改為甘川谷雍勝略唐置伏陸縣以此

黑龍山在甘泉縣東北二里又相近有雲陽山府志荒史循蜚紀雲陽帝都此

勞山在甘泉縣北二十里一統志有大小二山相傳宋狄青與夏人相拒士卒疲困嘗憩於此因名

馬超洞在甘泉縣北四十里與安塞接界通志崇山峻嶺上有十餘石洞洛水經其下道通邊塞相傳為馬超屯兵處

太和山在甘泉縣西南五里縣志一峰突起高聳孤立洛水經其下

神林山在甘泉縣西南二十里縣志連山包絡此山獨高於諸峰下有龍秋禱雨輒應

雕陰山在甘泉縣南二十里洛水西二百步漢書地理

志應劭注雕山在雕陰縣西南太平寰宇記山多土穴

為鷹雕所居又名秦望山

謹按雕陰故城在縣南

清泉山在甘泉縣東四十里通志林木叢茂山路崎嶇

已上
甘泉

鳳翼山在安定縣城西通志形似鳳翼為縣右輔

高柏山在安定縣北八十里通志即橋山漢書地理志

上郡陽周縣橋山在南有黃帝塚雍勝略山有古柏故

名縣志懷寧河出此即漢志陽周縣南之橋山秦二世

賜蒙恬死處

謹按陽周故城在縣北九十里又水經注云走馬水出長城北陽周故城南橋山上

有黃帝冢則橋陵似當在縣境

今世皆云陵在中部縣北也

滴溜山在安定縣北一百里一統志古木陰翳泉出巖

石間最稱幽勝

那娘山在安定縣西北七十里宋史地理志殄羌砦地

名那娘山元符元年賜名

堡子山在安定縣西二十里通志古為軍堡宋元豐四

年曲珍敗夏人於此

黑龍山在安定縣西三十里縣志翠柏千章蔚然深秀
上有龍王廟為鄉人禱雨處

鴉鴿山在安定縣南四十里通志山產鴉鴿二鳥並居
亦鳥鼠同穴之類

神木山在安定縣南六十里通志有古樹千株樵採不
敢入人以為神

蟠龍山在安定縣南八十里縣志蜿蜒起伏勢若龍蟠
上有古柏成林

灌清谷在安定縣東三十里

謹按縣志有九峪曰磨石峪曰黑狼峪曰東麻池峪

曰西麻池峪曰石峽峪曰鶴嘴峪曰官羅峪曰守經峪曰張蹟峪麻池峪即縣西七里之麻池鶴嘴峪疑即灌

清之訛守經峪在縣西三十里之

祖師山南餘所在之處俱未詳

楊家山在安定縣東三里通志峰巒秀麗環拱如屏

上已

安定

候雨山在保安縣西一里一統志舊名官山旁有石室

天將雨則室中烟霧四塞人以為候

金鼎山在保安縣西一百二十里洛水中通志四面無

依兀然孤峙昔時居民鑿石為垛穿石為門以避寇亂
接慶陽府安化縣界

石樓臺山在保安縣南七十里一統志奇峰突兀峭壁
陡絕下臨重淵土人築塞於此又於山崖鑿窰穴居之
艾蒿嶺在保安縣東六十里通志即子午嶺之分名也
綿亘延安慶陽兩府幾數百里相傳呂布生於此有呂

布窰

已上
保安

七郎山在宜川縣西南通志三峯鼎峙壁立千仞一統

志上有石門及山砦相傳宋時所築

鳳翅山在宜川縣東南五里太平寰宇記在縣南縣解
宇在其上雍勝略形如鳳翅故名

虎頭山在宜川縣北二里通志形似虎頭赤石銀川二
水會於其下又縣西北三里有公字山山形象公字

石閣山在宜川縣北九十里通志今呼為高山聳峙特
立俯視羣山下瞰黃河上有古寨太平寰宇記在雲巖
縣東北三十五里丹延兩州界形似樓閣

謹按雲巖故
城在縣北

雲巖山在宜川縣西北八十里通志魏雲巖縣以此名
太平寰宇記在雲巖縣東十里山形重疊如雲

庫利山在宜川縣西北一百里雲巖山西縣志與舊臨
真縣相接金史地理志臨真縣有庫利山

謹按臨真縣
今屬甘泉界

丹陽山在宜川縣西南水經注丹水出丹陽山魏書地
形志臨真縣有丹陽山雍勝略丹巖山上有仙人煉丹
爐縣志丹陽山一名丹巖山

盤古山在宜川縣東南百二十里通志山勢紆迴翼帶

河濱上有古碑剝落難曉

牡丹原在宜川縣東二十五里雍勝略盛產牡丹故名
安樂山在宜川縣東北七十里高樹嶺東通志一望平
原忽起孤峰秀入雲表九域志相傳昔時屯兵於此主
帥令唱安樂詞以慰其意因名

孟門山在宜川縣東北一百十里與山西吉州接界通
志黃河中流大石橫亘數百步河水分流俯視如門禹
鑿石導流之處又石湊在水南村黃河中遠望橫崖數

百丈其形壁立水氣噴薄如霧人不能近土人呼為濤
口呂氏春秋龍門未闢呂梁未鑿河出孟門之上大溢
逆流名曰洪水大禹疏通謂之孟門水經注孟門即龍
門之上口也實為黃河之巨扼此石經始禹鑿河中激
廣夾岸崇深傾崖返捍巨石臨危若墜復倚其中水流
交衝素氣雲浮往來遙觀者窺深悸魄懸流千丈渾洪
鼎怒濤波頽疊迄於下口方知慎子下龍門流駛竹箭
非駟馬之追也太平寰宇記在汾州縣東南二十里

謹按

汾州故城
在縣東

縣志在縣東北石潞下三里禹貢錐指西直

宜川縣與韓城之龍門相對在黃河中長七十餘尺

重覆山在宜川縣東北百四十里太平寰宇記在門山

縣東二十七里山形重疊故名

謹按門山故城在
縣北 已上宜川

東峰山在延川縣東一里通志一名太和山城跨山麓

青眉山在延川縣西北七十里太平寰宇記後魏時有

吐蕃青眉族居此

鰲子山在延川縣西七十里縣志相近有禪梯嶺為縣

境扼吭要口中有石洞

窪山在延川縣南百里雍勝略上有聖水泉旱禱輒應

已上
延川

錦屏山在延長縣南一里名山記四時花木繁茂中有
寺廟樓閣望如錦屏故名通志高聳秀麗形如畫屏翟
水經其下

漱玉崖在延長縣東一里通志崖下有泉聲如漱玉下
流為鴛鴦渚縈迴曲折翠蒲綠莎映帶如畫

高奴山在延長縣北雍勝略崔巍峻險山頂平行上有古寨

九連山在延長縣西十五里雍勝略九峰相接不斷故名

盤龍山在延長縣西五十里縣志懸崖峭壁延水環其下又花石崖在縣西七十里峭崖聳出玲瓏奇巧觀者比之太湖石

獨戰山在延長縣東北四十里太平寰宇記山勢險峻

一人獨戰可以當十因名

已上
延長

冢嶺山在定邊縣東南六十里通志在甌井堡南俗呼
南梁山有洛水出焉又北極山與冢嶺相對一峰巋然
望之若虬龍奮迅而上

黃羊嶺在定邊縣東南九十里甌井堡南通志為縣要

地

已上
定邊

駱駝山在定邊縣北套內通志在卯孩水東

錯子山在定邊縣北套外唐書回紇傳會昌元年回紇

為黠戛斯所破其牙部奉烏介特勒為可汗南保錯子

山榆林衛舊志山在西受降城北五百里

已上邊外名山附見定邊

蓮花山在靖邊縣西南通志宋范仲淹立寨於此

鶯窩山在靖邊縣西南延綏志在寧塞堡西南二十五里把都河北又有架礮山旗竿山俱在寧塞堡西南三十里把都河南二山崔巍並峙各置亭隧

蘆關嶺在靖邊縣東南九十里接安塞縣界延綏志延

水所出

已上靖邊

木賴山在靖邊縣北套內後周書突厥傳魏廢帝元年
突厥科羅破鄧叔子於沃野北木賴山

高闕山在靖邊縣北套外漢書匈奴傳元朔四年遣衛
青將六將軍十餘萬人出朔方高闕水經注趙武靈王
既襲胡服自代並陰山下至高闕為塞山下有長城連
山刺天其山中斷兩岸雙闕雲舉即狀表目故有高闕
之名自闕北出荒中

已上邊外名
山附見靖邊

臣謹按河套之地南抵邊牆北濱黃河遠者八九百

里近者亦一二百里今叙次其山川由套內而及套外仍以郡邑約略分屬之焉

大川

水利附

延安府清水在膚施縣東北自安塞縣南流入境又東入延長界水經注清水又東得龍尾水口又東會三湖水水出南山三湖谷東北流入清水清水又東逕高奴縣合豐林水地理志謂之洧水故言高奴有洧水肥可難水上有肥可接取用之豐林川長津瀉注北流會清

水清水又南奚谷水注之水西出奚川東南流入清水

謹按高奴故城在縣北

元和郡縣志膚施縣清水鮮卑謂之去斤

水斤一作筋北自金明縣界流入

謹按金明縣今屬安塞

太平寰

宇記濯筋水在縣北二十九里又流入豐林縣界耆老

云昔尸昆王割身救鵠身肉並盡於此水中濯其筋骨因

名縣志一名延水亦謂之濯巾水又金明川一名西小

河在縣西北五里自安塞縣流來入延水又南河水一

名杏子河在城南門外源出甘泉縣野豬峽北流至城

東入延水又清化水在縣東四十里自安塞縣流來入於延水

定疾泉水在膚施縣東一里百二十步萬佛寺北山半
崕縣志以尸昆王割膚救鵠因名其泉溫潔流入延水
柳湖水在膚施縣城南門外通志昔多種柳其上故名

謹按柳湖及南河水疑即水經注之三湖水然亦無可
考宋范仲淹和龐龍圖柳湖詩種柳穿湖後延安盛可
游遠懷忘澤國真賞即瀛洲江景來秦塞風情屬庾樓
劉琨增坐嘯王粲斗銷憂秀發千絲墮光搖匹練柔雙
雙飛乳燕兩兩睡馴鷗折翠貽歸客濯清招隱流宴回
銀燭夜行度玉關秋勝處千場醉勞生萬事浮惟公多

雅故思去

共仙舟

牧龍川在膚施縣東北五龍山下通志一名龍泉水經
注龍泉在土軍城東南道左山下牧馬川多產名駒
石油泉在膚施縣南二十五里酉陽雜俎高奴縣石油
水水膩浮上如漆採膏車及燃燈極明

暖泉井在膚施縣西北五十里雍勝略泉有七孔其味
甘美大寒衆泉皆凍惟此流溢不減

延利渠在膚施縣南三里通志宋司馬光為麟州通判

鑿引入城

謹按一云宋龐籍知延州時所開

渠久廢今城南石洞中猶

有延利渠三字

本朝雍正十年重修渠首在花石崖下引杏子河水鑿石

渠七十八丈五尺土渠三里餘經流沙梁南寺灌田數

百畝

宋司馬光延利渠詩枝分清淺流縱橫貫城
市還如恩在人利深無窮既已上庸施

洛水在安塞縣西北百二十里自保安界來東南逕縣

西南入甘泉界太平寰宇記洛河在敷政縣西七十里

穿番部來至城下

清水在安塞縣西北縣志源出蘆關谷南流抵城下逕
鳳凰山會西川水又東南入膚施界山海經陰山西北
百七十里曰申山區水出焉而東流注於河水經注區
水世謂之清水東流入長城逕老人山下又東北流至
老人谷隋書地理志金明縣有清水
謹按金明故城在縣北
西川水在安塞縣西通志自保安縣黃花城牛頭坡東
南流入與小平川會縣志西川水至縣東南二十里合
小平川入膚施界注於濯筋水

小平川在安塞縣西北通志即龍尾水水經注龍尾水
出北地神泉障北山龍尾溪東南流注清水縣志一名
金明川隋改置金明縣取此

背水在安塞縣北百五十里縣志源出武家南塔東流
至卧牛城三十里入綏德州合於無定河

砥目泉在安塞縣西十五里通志元孝子王思聰含水

砥其母目水甚清冽傍有湧泉寺

已上
安塞

洛水在甘泉縣西百步自安塞界流入逕縣西又東南

入鄆州界縣志從馬超洞東南流十里至白洛院寺又三十里至縣郭逕太和山東又東南流四十五里逕舊撫安驛入鄆州界

野豬峽水在甘泉縣東北四十五里通志源出峽左逕蘓家河至大勞山其水漸大阿伏斤水入此河俗名北小河西南入洛

阿伏斤水在甘泉縣東北三十里太平寰宇記源出大盤山東南姚嶮谷流入洛河縣志細流十里合北小河

又二十里入於洛

甘泉水在甘泉縣西南五里通志出洛水西太和山近頗埋塞惟存細流一綫入洛縣志在縣南崖谷上泉去地一丈飛流激射厥味甘美作飲饌盛暑不變唐天寶元年縣名甘泉以此

麻洞川在甘泉縣東百二十里通志即黑水源出麻洞東南流匯庫利水又東南入宜川界謂之汾川水水經注黑水出定陽縣西山二源奇發同瀉一壑東南流至

其縣

謹按定陽縣今屬宜川

太平寰宇記庫利川在臨真縣北十

五里

謹按臨真故城在縣東已上甘泉

黑水河在安定縣北百里通志自黑水堡東流至清澗界入懷寧河

秀延水在安定縣北門外東流逕清澗縣至延川縣東入河山海經辱水出鳥山東流入於河水經注辱水俗謂之秀延水東流得浣水口傍溪西轉窮溪即浣水之源也延水又東會於根水西南溪下根水所發而東北

注延水東南露跳水西出露溪東流又東北入延水亂
流注於河縣志有北河源出安塞縣北王家掌東流逕
秦重嶺又東逕安定縣城北通城壕亦名縣河又東入
清澗縣界謂之清澗水

謹按浣水根水露跳水蓋即縣境之麻兒河等水及清澗之東

西二河延川之站川諸水也然未有明證不可考

潘陵川在安定縣南八十里縣志發源縣之鴉鵲嶺南
流入膚施界為清化河

已上安定

洛水在保安縣西百里自慶陽府安化縣流入又東南

入安塞界通志源出合水縣白於山又流逕安化縣合
白豹川入縣境又馬步川在縣西百三十里源自安化

縣東流入洛

謹按馬步川
即白豹川

吃莫河在保安縣西六十里自靖邊界流入太平寰宇

記在保安軍北十里源出番部吃莫川南流至軍城西

六十里入洛河不勝船筏

謹按宋保安
軍即今治

園林川在保安縣東八十里通志一名杏子河又名東
川水源出牛頭坡至縣東六十里為響崖川南流入安

塞界為東川水府志東川水流逕園林驛入安塞縣合

延水

謹按膚施亦有杏子河別是一水已上保安

黃河在宜川縣東百里通志北由延川界逕本縣南至龍門入韓城界東岸即大寧永和吉州鄉寧等地中有壺口孟門即禹貢所謂既載壺口也水經注河水又南右會區水又南合黑水又南過北屈縣西其南為孟門山又南得鯉魚又南合赤水水出西北罷谷川東謂之赤石川東入於河河水又南合蒲水又南合丹水又南

合黑水水西出丹山東北入於河河水又南洛水自獵

山枝分東派東南注於河河水又南出龍門口

謹按北屈縣今

屬吉州其獵山之洛水已無可考

元和郡縣志黃河在門山縣東三十

五里又在汾川縣東七里河岸頓狹狀似槽形鄉人呼

為石槽蓋禹治水鑿石導河之處石槽長一千步濶三

十步懸水奔流鼃鼃魚鼃所不能游縣志黃河自延川

界來至本縣馮家圪入境又南至流源頭入韓城界凡

經縣境三百餘里

清水在宜川縣東北百二十里自延長界來東流入黃河水經注清水自合洧水又東注於河太平寰宇記渭牙川在雲巖縣北二十五里從延長界來流五十里入門山縣界金史地理志門山縣有渭牙川縣志澤徑水在縣東北百二十里一名岔界河東流入黃河

謹按澤徑水即

渭牙川也疑當別有一水乃今皆以清水為澤徑水矣

汾川水在宜川縣北八十里通志即黑水一名庫利川一名雲巖河水經注黑水源出定陽縣西山二源奇發

同瀉一壑東南流逕其縣北又東南流合定水定水俗
謂之白水出定陽縣南山定水谷又逕定陽縣故城南
又東注於黑水亂流東南入於河

謹按定陽故
城在縣西北

元和郡

縣志雲巖縣有庫利川在縣郭南縣志汾川源出甘泉
縣界逕本縣境行一百七十里東流入黃河

仕望川在宜川縣西北四十里通志源出甘泉縣東境
東流過平路堡又東合於銀川又庫碣水在縣西北二
十里川南為漢北為蕃其人於川內共締香火故呼香

火為庫碣

銀川水在宜川縣西一里雍勝略圍繞縣城北流合城南河通志今名西川水源出廊州晉師山流逕縣西北城外又逕縣東與赤石川合又喬家河在縣東北合於

銀川

謹按喬家河當即仕望川之別名

丹陽水在宜川縣西南通志即丹水水經注丹水出丹陽山東北逕丹陽城東又東北合白水口又東入河

謹按

丹陽城即今縣

元和郡縣志西魏置丹州因丹陽川為名太平

寰宇記蒲川水自鄜州洛川縣流入丹陽川

南川水在宜川縣城東縣冊源出神道嶺至縣境付曲

村合丹陽水流逕縣之東北二門與仕望銀川二水合

謹按南川今皆以
為卽赤石川疑誤

白水川在宜川縣東南百二十里府志在白水里以水

色偏白而名源出韓城硃砂嶺東流入黃河

謹按白水
今在丹水

之下入河恐非
水經注之白水

聖惠泉在宜川縣東南鳳翅山渾瑊祠下通志泉極甘

美深二三丈龍常吸水其中旱禱有應且能療疾

已上宜川

黃河在延川縣東七十里自清澗縣流入與山西永和縣分界又南入宜川界水經注河水又南右納辱水又

南過高奴縣東右會區水

謹按延川在漢亦屬高奴地

元和郡縣志

黃河在延川縣東八里

謹按唐延水縣在縣東南

秀延水在延川縣東城下通志即辱水一名清澗水又名吐延水俗名縣河水經注秀延水東會根水又東南會露跳水亂流注於河元和郡縣志縣有吐延水北自

綏德縣流入縣志自清澗縣南流入逕縣東北至永寧

關入黃河

謹按西魏置延川縣本以界內有吐延水為名今人多以清水為延水其實非是

站川水在延川縣北一里通志源出禪梯嶺東流逕文安驛又東入清澗水又小瞿唐在縣西五里南為岡北為碣中有石澗甚隘水流湍急故名小瞿唐

石油井在延川縣西北八十里永平村通志其地名石油溝井出石油可燃燈每歲六月取之塗已瘡疾

已上延川

交口川在延長縣東北六十里縣志源出縣西北東流

經獨戰山下入延川界

清水在延長縣南自膚施縣流入逕縣東入宜川界元和郡縣志唐移縣於去斤水縣志自膚施盤曲而來經縣南流入黃河一名翟水即濯筋河也又縣西石磴矗起盤折流向西門後人鑿石通水建永逸橋謂之朝陽水石油井在延長縣南錦屏山下通志其油可燃兼治癰

疥

已上
延長

洛水在定邊縣東南百五十里史記晉文公攘戎居於

河內固洛之間縣冊洛水源出琉璃廟石縫中東南流

逕頁水川合鐵鞭城水入保安界

謹按通志以此為洛水別源

三山水在定邊縣西南百里縣冊源出三山兒東南二
岔合石澇池水逕饒陽堡饒家水東注之又南入北蕭
關合木瓜城水黑城子水跌脚城水沙家掌水梁家溝
水汝麻臺水塔兒掌水入紅城子經環縣西南即馬嶺
水上源也

鹽池在定邊縣西北鹽場堡北一統志元和郡縣志云

鹽州五原縣鹽池四所一烏池二白池三細項池四瓦
窰池烏白兩池出鹽今度支收糶其瓦窰池細項池並
廢今縣本唐鹽州地此鹽池當即烏白等四池之一延
綏志原屬靈夏衛嘉靖九年總制王瓊改屬本衛池周
三里許中有井引水溉畦一夕視之若積雪此九種之
一也又其東南有滂池鹽池水鹵不可飲滂池水可飲
堡人汲者便之二池之西為寧夏境

謹按通鑑地理通
釋漢於上郡龜茲

置鹽官疑即此

已上定邊

咂把湖在定邊縣北套內延綏志在舊臨戎縣南馬理

陝西通志在駱駝山南

已上邊外大川附見定邊

收麥河在靖邊縣東南十里通志源出縣東南收麥城下北流至縣北有紅柳河自定塞堡流入逕范老關西又東北至城北合流出邊為大狼河東逕鎮羅鎮靜二堡北又東至龍州堡合滉忽都河或曰滉忽都河有別源出靖邊城西石頭溝東北流合城東之黑龍王溝而出邊入鎮羅界即此又有海棠河在鎮靜堡北塞外東

流至威武堡東入滉忽都河

杏子河在靖邊縣南三十里通志發源總管塔南流逕

牛頭坡又逕杏子城西入保安界

已上靖邊

屠申澤在靖邊縣北套內通志一名渾澤漢書地理志
窳渾縣有道西北出雞鹿塞屠申澤在縣東水經注河
水溢於窳渾縣故城東其水積而為屠申澤澤東西一
百二十里闕駟謂之渾澤

彬草湖在靖邊縣寧塞堡西北套內又神水灘在縣東

北套內通志有水一泓周百餘步平地突出數丈迸珠
濺玉旱澇並無增減延綏志在鎮靜堡北水如趵突冬

夏淵渟

已上邊外大
川附見靖邊

古蹟

第宅

延安府宋供兵碓一統志在府城南又鐵錢監九域志

熙寧八年置在延州城東

宋司馬光供兵碓詩晨暮響
寒泉飛輪駛風轉士飽氣益

振輕輿
先零戰

摘星樓一統志在膚施縣東南嘉嶺山又嶺西樓在縣

西鳳凰山俱范仲淹建

迎薰亭一統志在膚施縣南柳湖其旁有禊臺翠琦亭
皆宋韓琦建

飛蓋園膚施縣志在縣南三十五里知延州龐籍遊讌
處司馬光詩軍中富餘暇飛蓋城南隈因以為名

翡翠樓一統志在延長縣東南六十里聖燈溝上石臺
周四百餘步高百丈上有樓極目山川蒼翠又鬬雞臺

在縣西二十里

創建時代
俱無考

右蹟祠宇

唐渾忠武王祠一統志在宜川縣東鳳翅山祀渾瑊

香林寺一統志在安塞縣西洛水濱開元初建

白鶴觀一統志在宜川縣南三里明皇為老子建

宋韓范祠一統志在府城東關祀韓琦范仲淹

五賢祠一統志在膚施縣西山祀周二程張朱五子

二賢祠一統志在宜川縣南門外祀胡瑗張橫渠

李太尉廟一統志有二一在安塞縣西五十里一在保

安縣東北九十里亦曰順惠王廟祀李顯忠

金蹄犢子廟一統志在安塞縣南太平寰宇記在敷政縣西三里有古城昔有犢子出於石縫中金蹄銀角化為玻黎玉因立此廟城今毀

髑髏山神廟太平寰宇記在延長縣東六十里相傳古時戰鬪收人首千萬於此山因置神廟

謹按赫連勃勃殺人積為京觀

謂之髑髏臺或即此也

可野寺一統志在宜川縣北太平寰宇記在雲巖縣北

十五里故老相傳劉蔭河坐禪處土人呼堡為可野四面懸絕惟北一面可通

金萬佛寺一統志在膚施縣東北清涼山有大小石佛萬餘多金元舊碣上又有清涼寺舊傳為尸毘遺跡

古蹟 郊邑

秦長城府志在定邊靖邊二縣北史記始皇使蒙恬將三十萬衆北逐戎狄收河南地築長城因地形用險制塞延袤萬餘里水經注走馬水東北入長城即蒙恬所

築也

漢藩延堡通志在安塞縣西南一百里相傳為馬超所築

丹陽城一統志在宜川縣西漢書食貨志金有三等赤金為下孟康曰赤金丹陽銅也水經注丹陽水經治東俗謂之丹陽城城之左右猶有遺銅

晉三城一統志在膚施縣東南咸和九年北羌王薄句大等擾北地馮翊石宏將郭敷石斌討之薄句大奔馬

蘭山教乘勝逐北為羌所敗弑將餘衆保三城義熙三年赫連勃勃以朔方叛秦攻秦三城以北諸戍悉拔之晉書地理志赫連勃勃平劉義真以朔方收鎮三城魏書地形志廣安縣有三城

謹按廣安故城今在延長縣東

黑城一統志在甘泉縣東太平寰宇記在臨真縣東二十五里庫利東流川交口赫連勃勃大象二年於此置郡其城緣山坡崎嶇不正遂名黑城

聖人城一統志在保安縣東七十里太平寰宇記從蕃

界末鄒族界來經保安軍界一百五里入敷政縣界即
赫連勃勃自夏臺入長安時平山谷開此土人呼為聖
人道

百井成一統志在靖邊縣南元和郡縣志在長澤縣南

八十里赫連勃勃與僂髮儁檀戰處

謹按長澤故城在縣東

後魏臨真城通志在甘泉縣東一百八十里後魏為城
今為鎮秦晉衝路一統志居民繁庶為縣大鎮

尸毘墓夢溪筆談延州天山之巔有奉國佛寺庭中有

一墓世傳尸毘王之墓尸毘出於佛經大智論言常割身肉盡今天山下有濯筋河其縣為膚施慶厯中施昌言鎮鄜延壞奉國寺為倉發尸毘墓得玉環玦七十餘件

隋薄姬冢通志在甘泉縣西六十里塚高丈餘其間老柏古松蓊鬱相映縣志俗傳煬帝納妃名薄姬歿後葬此

唐杜甫川府志在府城南七里西南折入四十里牡丹

遍山谷樵者採之為薪歐陽永叔花譜所謂延安牡丹
與荊棘無異者也甫避亂寓此范仲淹大書杜甫川三
字於川口

謹按杜甫寓延州無可考然甫有塞蘆子詩
又彭衙行云少留同家窪欲出蘆子關意亦

其遊歷所及今從
陝西通志載之

蘆關通志在安塞縣北一百五十里雍勝略有東西二
城遺址唐書地理志延長北有蘆子關長慶四年築城
於關北以護寨外元和郡縣志關屬夏州在寨門鎮北
去鎮一十八里

謹按寨門鎮在縣西北一百五十里元
和郡縣志本在夏州寧朔縣界開元二

年移就蘆子關南金鎮所安置又考明成化二年移置
榆柳莊名鎮靜九年復移於白塔澗口去塞三百里縣
志稱城垣屹然蓋舊寨之遺基也通鑑後唐長興四年李彝超以夏州

拒命命藥彥稠等討之進屯蘆關彝超遣党項抄掠官
軍自蘆關退保金明趙珣聚米圖經自蘆關南入寨門
為金明路舊有蘆關寨宋史地理志至道中廢元豐四
年復為戍守之所李繼周傳淳化五年繼周以阿都關
寨門蘆關等砦最居邊要遂規修築砦城蔡夢弼杜詩
注去延州百八十里有土門山兩崖峙立如門形如葫

蘆故謂之蘆子縣志北控沙漠舊設兵固守今城猶新
環城阬窖尚存別名鐵門砦

洪門故鎮一統志在靖邊縣南唐書張獻甫傳獻甫領
邠寧節度使請復鹽州洪門及洛原鎮屯兵詔可太平
寰宇記宥州南至洪門鎮八十里為界

渾城墓一統志在宜川縣西南五十里

後梁高萬金墓通志在府城南八十里盤龍村延綏志
萬金河西人高萬興弟延州刺史貞明四年卒乃以萬

興為鄜延節度兄弟世家其土

宋金明砦通志在安塞縣東南一百一十步宋史地理志熙寧五年省金明縣為砦周美傳康定初夏人破金明諸砦美請於范仲淹曰金明當邊衝今不亟城將遂失之仲淹因屬美復城如故

新興堡安塞縣志在縣西南一百五十里控延安東北疆遠川一帶太平興國中築一名新砦

招安橋通志在安塞縣西北四十里甃石為之狄青築

招安砦於橋子谷即此地歷元迄今往來利濟

柳榆堡通志在安定縣西北四十里范仲淹所築

園林堡通志在保安縣東八十里即園林驛九域志慶
歷五年置

金湯城通志在安定縣西北一百二十里宋史哲宗本
紀元符二年築廊延路金湯城周美傳美敗夏人於金
湯城焚其族部二十一縣志為縣戍守要地今基址猶
存與慶陽黑水接界

雲巖鎮通志在宜川縣北少西八十里府志山巖重疊如雲故名後魏置縣唐因之宋熙寧中省為鎮

劉延慶墓一統志在保安縣北二里延慶官保信軍節度使

金永平堡通志在延川縣西北一百里金史地理志延

川寨一永平府志古永州城

謹按唐武德二年於金城縣界內置永州縣志

皇統二年修寨一所明知縣王世相金棟繼修

元瓦埡堡通志在安定縣東三十里元初建因山為堡

明季寇數至邑人郭永治守禦有方堡賴以無恐

高奴寨通志在延長縣北二百里北山府志元圖烈巴
今參政何遠築以屯兵周二百九十八步在高部山上
四面陡絕俗訛為高奴非也

明延水關通志在延川縣東南七十里吐延川口東臨
黃河北通山西永和縣府志魏置文安縣隋唐改延
水宋省為鎮入延川今為延水關又有清水關在縣東
南一百里清水川口東臨黃河北通山西大寧縣有清

水關渡

文安堡通志在延川縣西三十里明參政張愚築又禪梯
嶺堡在縣西七十里嘉靖間延綏巡撫張珩言延川縣
西有禪梯嶺乃套夷深入之路比他鎮獨重宜增築一
城從之

甄井堡一統志在定邊縣東四十里正統二年置後余
子俊以甄井難守於迤西東海螺城改置新興堡嘉靖
三十二年復修甄井城在平川為極衝上地又新興堡

在縣東南八十里成化十一年置城在山上為次衝中地

安邊堡一統志在定邊縣東一百里亦名舊安邊營地名深井正統二年置城在平川為極衝中地成化十一年余子俊以其地平曠難守移守深河兒地名中山坡改置新安邊營城在山坡為極衝中地背山面水險阻四塞嘉靖三十三年巡撫王輪以舊營地近大邊復守之於是新舊兩營並置

柳樹澗堡一統志在定邊縣東一百四十里天順初置
為極衝中地又名澇池堡在縣南一百里成化十一年
置三山堡在縣西南九十里成化九年置饒陽水堡在
三山堡南四十里成化十三年置

鹽場堡一統志在定邊縣西四十里成化十三年置城
在平川為極衝中地

鎮羅堡一統志在靖邊縣東北四十里本名魚口砦明
萬曆十八年增置城在平川為極衝中地

鎮靜堡一統志在靖邊縣東北八十里地名白灘兒亦名白塔澗口明初守安塞縣塞門成化三年尚書王復請移於榆柳莊改名鎮靜後又移此城在山畔北臨快灘河為極衝中地

龍州堡一統志在靖邊縣東北一百二十里明成化五年置城在平地為極衝中地

寧塞堡一統志在靖邊縣西四十里明成化十年置城在山原為極衝中地又把都河堡在寧塞堡西三十四

里把都河口成化九年置

關中勝蹟圖志卷二十三